

# Vun driweriver

erscheint auf [www.lenauheim.de](http://www.lenauheim.de)

monatliche  
Erscheinung

Oktober 2010

von *Helen Alba*

## Vun kummod bis zu vergesslich

Seider es Kathi ufm Mark anstatt Kuhkäs e rosarote Flarre kaaft hat (de Käs war am zweite Taa e rosarote Batze), war sei Gusta gebiest un es hat sich vorghol, niemehr was vun de Fratschlweiwer zu kaafe. Sei Freindin, es Klari, hat gerot: „Zu mir kummt jedi Wuch e Milchauto un bringt allerhand wie Milch, Käs, Rahm direkt vun eener Ferma. Schreib dich in un kummscht zu mir immer scheen alles abholle. So bischt versorcht, weescht wu des Sach herkommt un muscht nit rumlaafe“. So han die zwaa Weiwer des a gemacht un es Kathi is jede Freitach sei Käs in die Fabrikstadt abholle gang. Es enzich Problem war, es Klari hat ufm vierte Stock gewohnt, es hat dorte ke Lift gin un es Kathi hat immer krawwle misse.

So war mol wieder de Milchtaa, es Klari hat angeruft un gement: „Kathi, in eener halb Stund muss ich in die Stadt. Ich bring der die Käs mit, dann brauchscht nit die ville Treppe nufhupse. Un mir treffe uns in der Elektrisch Halterstell“. So han die zwaa des aa gemacht, sie sin ins Rede kumm, sin mitnander in die Elektrisch ingstie, weil's Klari in die Josefstadt hat wille un es Kathi a dorte derhem war. In der Elektrisch han se weiter getratscht, sie sin in der Josefstadt ausgstie, han noch e gudi Weil zu verzähle ghat un ufmol saats Kathi: „So, jetz han mer uns genuch vertoort. Ich hol mei Käs un geh e Heisl weiter. Gif ne her, hascht ne die ganzi Zeit genuch nohgetraa!“

„Jessmandjosef Kathi, de Käs is in der Fabrikstadt, bei mir derhem im Eiskaschte. Was jetz?!“ Es is nix weiter iwrich geblieb, wie je wieder zruck. Die zwaa han e neijes Gspräch anfang, es Kathi is halt die ville Treppe nuf un wieder nuner. Weil es Klari hat sich rumbedenkt. Ihm war die Luscht for nochmol in die Stadt fahre, vergang. Un es Kathi hat sich gedenkt: so is mer halt, wann mer in die Johre kummt. Ens is zu kummod, des anri halt vergesslich!

## Trauweeles vor Johre

In dem Herbst sin die Trauwe aarich saftich un siess. Wann ich dorch de Mark gehn, is mer die Wahl e Qual. Weil ich nit weess, welli ich kaafe soll, weil se alli e anre Gschmack han. Do han ich an eem Owet, wie ich Speck un Brot un Trauwe derzu gess han, dran denke misse, wie mer Trauwe lese un ufs Trauwebaal gang sin. Mir derhem han nit sovill zu lese ghat, es war im Garte nor e Spallier mit Gutedl, do han mer vill dervun gess un nor bissl Wein gemacht. Un de Wein, der is a nit getrunk gin, de han mer verkaaft.

Doch mer han e Tant un Onkel ghat, die han ke Kiner ghat. Un bei der Trauweeles do is die ganzi Freindschaft zammkumm for helfe, weil ihre Hausgarte, des war e kleene Weingarte mit Gutedl, Geisetittle, Ochseaue, Schmeckichi un anre Trauwesorte. Schun von derhem aus han mer e Eemer mitghol, je greesser der war, umso besser. Weil am Schluss han mer uns de Eemer voll Trauwe mache un mit hem holle kenne. De Garte war voller Leit, alli han emsich gelest un gschaut, dass mer vorwärts kumme. Wie alli Trauwe im Fass ware, is de erschte Moscht geloff un es hat gheescht: jetzer mol alli an de Tisch, ihr hat sicher schun Hunger!

Un was die Tant dann alles ufgetischt hat! Gekochtes Schungefleisch, selwergemacht Lewerpasteten aus Hingels- un Gänselewer, kalte Braten, allerlei Salate, Schof- un Geisebrinse, selwer gebacktes Brot un wenschtens finferlei Kuche. Derzu natierlich Moscht un aa Wein vum vergangene Johr.

Aa ufs Trauwebaal sin mer gang. Es Wertshaus war voller Trauwespalliere, die Trauwe han ziemlich hoch ghong, weil iwerm Tanze han die Buwe hupse misse, for ihrem Mädli e Hängl stehle. Wann se derbei derwisch sin gin vun de Ufpasser, des ware die sogenannte Schandare, han se bleche misse, die Musikante han jo Dorscht ghat un vun dem Geld, was beim Trauwestehle inkumm is, sin die dann mit Wein versorcht gin. Je meh Trauwehänge gstohl gin sin, umso meh Geld is inkumm, umsomeh han die Musikante trinke un in Schwung kumme kenne.